

Sia single è gio ainten la parada da hits

Lucerna/Casti: success per la cantadoura Naomi Candreia

DA GION NUTEGN STGIER/FMR

■ Adegna puspe ins sainta sur ples emettours da radio en hit tgi sa nomna «Don't Give Up». Chegl dei betg anc schi bler. Cun neir ad ureglia igl nom dall'interpreta da chella bela melodia, alloura è da supponer tgi la cantadoura ò d'aveir ena relaziun cun Surmeir. Sies nom: Naomi Candreia. Igl nom Candreia cunaschainsa cunzont tar famiglias da Stierva e da Casti. Ena persunga tgi cunaschagn bagn è alloura er *Linard Candreia*, igl sribent surmiran tgi stat alla Bassa ed è schizont deputo aint igl cantun Basilea campagna. Da *Naomi Candreia* ins ò anfignen ossa betg anc santia schi bler, ma dei giarogl betg tgi igl sies nom è omnipreschaint. La raschung è tgi la matta da 24 onns ò ena vusch da bellezza, ena vusch sonora, clera, fegna, cumpletta e plagn calour. Naomi Candreia è egna dallas dus feglias da *Mario Candreia*, igl anteriour schurnalist e moderatour dad RTR. Tratg se è el a Casti ed oz stat Mario Candreia a Lucerna.

En promotour cun experientscha

Ricardo Sanz tgi totga an Svizra tar ena corifea schi vo per cant, musica, texts e cumposiziuns dei tgi Naomi Candreia seia en grond talent da cantar ed ella vegia abilitads scu betg schi blers talents vegian. Chegl seia er la raschung tg'el vegia fatg igl 2019 en contract cun ella ed er registro cun Naomi Candreia la sia amprema single «Don't Give Up». Sanz è persuadia tgi la cantadoura da Casti vign a far la sia veia, avend ella ena vusch tg'ins sainta betg schi bler ed er ena vusch tgi geia a cor. Ainten la scena da musica ins canoscha igl producent.

El ò gio retschet divers premis, tranter oter igl Prix Walo e dus gedas en Swiss Music Award. Cun la gruppa «Heimweh» ò Sanz retschet en award da platin per aveir vandia 20 000 exemplars digl disc compact «Vom Gipfel is Tal».

Gudagnea ena concorrenza da cantar

Gio cura tgi Naomi Candreia cantava cuagl chor dalla scola primara tutgiva ella tar egna dallas mattas cun ena vusch sonora ed extraordinara. Igl 2011 ò Ra-



Naomi Candreia è cun la sia amprema single schizont ainten la parada da hits svizra.

MAD

dio Grischa, oz Radio Südostschweiz, registro cun Naomi Candreia igl hit «Beautiful» da Christina Aguilera. Adegna puspe ò igl emettour alloura emess chella melodia. Oz ins sainta alloura er tar chel emettour savens igl amprem hit da Naomi Candreia «Don't Give Up». Avant treis onns ò ella gudagnea ena concorrenza da cantar e pudia far igl viadi a Las Vegas persiva. An otg emdas cumpara la sia pi nova ediziun, ena ballada plagn sentimaints.

Absolventa dalla scola d'actours

An en onn terminescha Naomi Candreia igl sies studi d'actoura. Da preschaint è ella absolventa dalla scola d'actours Vera Forster a Turitg. La matta ò termino cun success tots igls sies examens intermedians e sa prepara ossa segls examens finals. Adegna puspe ins vei Naomi Candreia ainten videos da musica registros a Venezia ed an Germania. Savens cumpara ella er ainten videos da reclama. Ena fermezza dad ella è la pronunztga perfe-

tga e chegl schizont an ples dialects ed er an tudestg da scritgira.

Tranter Lady Gaga e Loco Escriito

Damai torga la single «Don't Give Up» da Naomi Candreia tar egna da chellas tgi figureschan an Svizra ainten la parada da hits digls charts tgi vignan vandias igl pi bler. D'ansomma far chel zap ainten la parada da hits svizra è gio ena prestaziun tgi mareta respect. Gist oz tgi dat schi bleras bands ed anc daples cantadouras tgi

von da success a success e vendan lour discs cumpacts e singles scu panets frestgs. Da preschaint è Naomi Candreia plazza-da sen plaz 36 cun la sia amprema single «Don't Give Up». Ella è cò an buna cumpagneia percheigl tgi davant la cantadoura surmirana è Lady Gaga, igl grond star rango, cuagl sies hit mundial «Always Remember Us This Way». Gist siva Naomi Candreia cattainsa cun Loco Escriito ed igl sies hit «Adios» en cantadour tg'ò success cun la sia musica latinoamericana.

Premaveira tiers coronavirus



La premaveira s'annunzta dafora.

■ (fmr/gns) Igls ciclus dalla nateira èn definias durant igl antier onn e chegl an ples gros. Schinavant tgi las cundiziuns externas ed internas correspondan, alloura succedan chels proceders ainten la nateira cura tgi ella decida. Blers da chels proceders èn alloura vasibels ed oters betg. Gist la premaveira, cura tgi la nateira sa desda, igls utschels cantan, las flours flureschan, las plantas pruien ed i vign pi tgod sa mossan chels proceders fitg bagn. Schi chestas relaziuns constatan pon tals evenimaints er succeder ordvart igls ciclus usitos. Er a Vasarauls, ena fracziun aint igl nord dalla vischnanca Brinzauls, sa fon gio ossa santer chels proceders cun flureir las ampremas flours da premaveira ainten la nateira, igls ierts e sen las plantas. Damai s'annunzta la premaveira planget er an Val Alvra tiers igl coronavirus. Eir or ainten la nateira, galdeir igl bel suglegl e l'aria frestga duess er igl coronavirus betg frenar, pertge gist siva igls deis pi lungs digl anvien fò igl suglegl bagn a corp ed olma e lascha daventar igl coronavirus secundar.



Eir or ainten la nateira duess er igl coronavirus betg frenar.

FOTOS G.N.STGIER